



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
ZASTUPNIČKI DOM

Komisija za vanjske poslove

Broj:01,2-011-341-04/03

Sarajevo, 14.03.2003.godine

ZAPISNIK

Sa sedme sjednice Komisije za vanjske poslove

Sjednica je održana 12.03.2003. godine sa početkom u 13:00 sati.

Sjednici su prisustvovali sljedeći članovi:

Iz Komisije za vanjske poslove Zastupničkog doma Parlamentarne skupštine BiH: Martin Raguž, Milorad Živković, Seada Palavrić, Izet Hadžić, Azra Hadžiahmetović, Sead Avdić, Jelina Đurković, Nenad Mišić i Vinko Zorić.

Iz Komisije za vanjsku i trgovinsku politiku Doma naroda Parlamentarne skupštine BiH: Velimir Jukić, Vinko Radovanović, Osman Brka i Nade Radović, te sekretar Komisije Nevenka Savić.

Iz delegacije Parlamentarne skupštine BiH u Vijeću Evrope: Hasan Muratović, Goran Milojević, Ljiljana Milićević, Ilija Filipović i Ivo Lozančić. Ostali članovi su i članovi Komisije za vanjske poslove Zastupničkog doma parlamentarne skupštine BiH.

Gosti sedme sjednice Komisije za vanjske poslove bili su:

Iz Ministarstva vanjskih poslova BiH: Mladen Ivanić – ministar; Lidija Topić – zamjenica ministra; Fuad Šabeta – sekretar Ministarstva; Ana Trišić-Babić – pomoćnica ministra; Ibrahim Đikić – pomoćnik ministra; Miranda Sidran-Bešlagić – glasnogovornik Ministarstva.

Iz direkcije za evropske integracije: Amela Alihodžić, Sabrija Šerifović, Kenan Tahmišić, Emir Hadžikadunić.

Predsjedatelj Komisije za vanjske poslove predložio je sljedeći:

DNEVNI RED

1. Verificiranje zapisnika sa 6. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 05.03.2003.godine;
2. Upoznavanje članova Komisije sa stupnjem ispunjavanja obaveza koje Bosna i Hercegovina ima prema Vijeću Evrope i drugim međunarodnim institucijama u 2003.godini – Radni materijal sa listama obaveza koje je BiH prihvatila na osnovu prijema u punopravno članstvo Vijeća Evrope sa pregledom aktivnosti, stanje 31.01.2003. godine;

3. Rasprava o aktualnim političkim dešavanjima u svijetu, a u svjetlu krizne situacije u Iraku – Informacija o krizi u Iraku, dobijena od Ministarstva vanjskih poslova BiH, 24.02.2003.godine;
4. Izvješće o aktualnom stanju mreže diplomatsko-konzularnih predstavništava BiH u svijetu;
5. Rasprava o Prijedlogu plana posjeta za 2003.godinu na nivou Parlamentarne skupštine BiH koje je Ministarstvo vanjskih poslova BiH dostavilo Komisiji 04.02.2003.godine;
6. Informacija o 4. Parlamentarnoj konferenciji Pakta stabilnosti za Jugoistočnu Evropu, 21.-22.05.2003.godine;
7. Tekuća pitanja.

Ad.1. Predsjedatelj Martin Raguž zamolio je da se verificiranje zapisnika sa šeste sjednice Komisije za vanjske poslove odloži za kasnije, te da se otpočne sa tačkom 2. Dnevnog reda zbog obaveza ministra Ivanića i zamjenice Topić da prisustvuju sjednici Predsjedništva BiH zakazanoj za taj dan.

Ad.2. Predsjedatelj Komisije, g. Raguž zatražio je od ministra Ivanića kratko uvodno obrazloženje o temi postprijemnih obaveza prema Vijeću Evrope i drugim međunarodnim institucijama, a tiče se i ocjene pozicije BiH u ovom trenutku u odnosu na Studiju izvodljivosti, uz napomenu da su prisutni dobili materijal postprijemnih obaveza BiH.

Ministar vanjskih poslova BiH, g. Mladen Ivanić naglasio je da je BiH primljena u Vijeće Evrope u aprilu prošle godine i da je u okviru toga prihvatila cijeli niz postizbornih obaveza. Tim Vijeća Evrope dao je pozitivnu ocjenu na osnovu viđenog nedugo po prijemu BiH u Vijeće Evrope. Minisar je naglasio da postoji 71 obaveza, sa podobavezama, te da je naša zemlja u potpunosti ispunila 14 obaveza,. Napravljen je jedan pregled šta je sve ispunjeno. Od toga su ratificirane Evropska konvencija o zaštiti ljudskih prava, protokoli 1,4,6,7 i 11, Ženevska konvencija o statusu izbjeglica, Protokol o statusu izbjeglica, Evropska konvencija protiv torture i nehumanog postupanja, Evropska povelja o lokalnoj samoupravi, zatim Zakon o udruženjima i fondacijama, kako u BiH, tako i u entitetima, Krivični zakon, Zakon o državnoj službi, Zakon o ombudsmenima BiH, Zakon o unutrašnjim poslovima u oba entiteta, Zakon o osnovama Javnog Radiotelevizijskog servisa BiH te Konvencije UNESCO-a o kvalifikacijama stečenim visokim obrazovanjem. Usvojeni su pojedini zakoni koje je Visoki predstavnik donio svojom odlukom. Pregled tih zakona je takođe dostavljen. Naglašeno je da se 19 obaveza mora kontinuirano ispunjavati. No, naglašeno je također da 21 obaveza nije ispunjena, i one se u što skorije vrijeme moraju realizirati, jer bi to dalo snažnu poruku Vijeću Evrope, a time i Evropskoj Uniji.

Predsjedatelj je otvorio raspravu o uvodnim napomenama ministra Ivanića.

Vođa delegacije Parlamentarne skupštine BiH u Parlamentarnoj skupštini Vijeća Evrope, g. Hasan Muratović, naglasio je da svaki dužnosnik u Vijeću Evrope ističe obaveze koje stoje pred BiH, a koje je pomenuo ministar, te da se analitički treba pristupiti provedbama svih zahtjeva, bez izuzetka. Da bi se što efikasnije sprovedli zadaci, bilo bi korisno oformiti grupu, bilo pri Ministarstvu vanjskih poslova ili Direkciji za evropske integracije, koja će nadzirati provedbu Konvencija, zakona, te da o tome referira Parlamentarnoj skupštini. Ovo tijelo neophodno je formirati što prije zbog zasjedanja Parlamentarne skupštine Vijeća Evrope 31.03.2003.godine.

G. Sead Avdić izrazio je svoje zadovoljstvo zbog postojanja političkog konsenzusa o putu BiH ka evroatlantskim integracijama. Također je zatražio usaglašavanje oko

deadline-a za ulazak BiH u Evropsku Uniju, i program funkcioniranja Parlamenta u narednih 5 godina. G. Avdić je pledirao na ubrzanje procedure oko socijalne povelje Vijeća Evrope, jer ona implicira proces tranzicije BiH.

G-đa Azra Hadžiahmetović pridružila se diskusiji oko ispunjenja obaveza prijema BiH u Evropsku Uniju, te je zahtijevala da se precizira koji je krajnji datum za realizaciju tih obaveza, te da se zakoni koji predstavljaju obaveze BiH pripreme za oba doma Parlamenta.

G. Milorad Živković je naglasio da je zadatak Komisije, po članu 37. Poslovnika, da prati vođenje spoljne politike od strane Predsjedništva i Savjeta ministara BiH, te ujedno izrazio svoje razočarenje što neko od članova Predsjedništva nije našao za shodno prisustvovati ovom skupu. Pitanje Iraka bilo je povod za sjednicu, i on smatra da se ova komisija treba kontinuirano sastajati sa Ministarstvom spoljnih poslova svakih dva do tri mjeseca, jer bi time suradnja bila kvalitetnija.

G-đa. Amela Alihodžić je istakla dva momenta koji se odnose na postprijemne uvjete. Odmah nakon prijema BiH u Vijeće Evrope Ministarstvo za evropske integracije uputilo je jednu inicijativu Vijeću ministara za formiranje komisije koja će biti zadužena isključivo za praćenje stepena ispunjenosti postprijemnih uvjeta. U tu komisiju su bili predlagani pomoćnici ministara iz državnih ministarstava, resornih ministarstava sa entitetskog nivoa, iz Predsjedništva i članovi iz Parlamentarne skupštine BiH. Cijeli proces je bio doveden do samog kraja, međutim, tri organizacije nisu uspjele imenovati svoje predstavnike, tako da, nažalost, ta inicijativa nije dovedena do kraja. No, to bi bilo izuzetno korisno, jer je predviđeno da ta komisija redovno izvještava ne samo Vijeće ministara nego i Parlamentarnu skupštinu BiH, Predsjedništvo BiH i sve ostale sudionike u ispunjvanju postprijemnih uvjeta. Drugi moment odnosi se na harmonizaciju, provjeru harmoniziranosti legistlative BiH sa Evropskom konvencijom o zaštiti ljudskih prva i osnovnih sloboda, što zahtijeva maksimalno posvećivanje tom problemu.

G. Ivanić složio se sa mišljenjem g. Živkovića da je neophodno održavanje sastanka Komisije i Ministarstva vanjskih poslova, te da se tim putem izvrši pregled urađenog do tog perioda, a da formiranje posebne grupe koja će vršiti nadzor nad implementacijom postprijemnih obaveza nije potrebno, jer se znaju ingerencije svake institucije. Informirao je skup, na inicijativu g-đe. Hadžiahmetović, o tome gdje se naša zemlja nalazi sa Studijom izvodljivosti. Naglasio je da je Road Map ispunjen, ali da se čeka inicijativa Evropske Unije oko daljih koraka koje trebamo poduzeti. Ministarstvo očekuje da će krajem tekuće godine dobiti rezultate Studije Evropske Unije o BiH, a da bi prvi kvartal naredne godine predstavljao početak pregovora o priključenju.

Predsjedatelj je predložio da se zaključi rasprava o drugoj tački.

G. Osman Brka je zahtijevao da se iz dosad navedenoga izvede obavezujući stav. Također je naglasio da do sada nije postojala instanca koja bi bila odgovorna za sprovedbu obaveza koje stoje pred našom zemljom te da se tačno utvrdi ko je iz Ministarstva vanjskih poslova zadužen za to.

G-đa. Ljiljana Milićević je napomenula da je neophodno isforsirati ono što je preostalo da se uradi, a da Ministarstva koja su nadležna vode računa o rokovima.

G-đa. Seada Palavrić kazala je da se na Konferencijama o ljudskim pravima ponavlja kako BiH ne dostavlja izvještaj niti po jednoj Konvenciji kojoj je pristupila i koju je ratificirala, te je zatražila da se izvještaji bezuslovno dostavljaju. Također je navela da se zbog ozbiljnosti zadatka, Komisija i Ministarstvo vanjskih poslova ponovno sastanu 24.04.2003. godine, na prvu godišnjicu prijema BiH u Vijeće Evrope, da bi se dala ocjena za ono što je urađeno od predloženog.

Predsjedatelj Komisije, g. Raguž predložio je zaključak po prvom dijelu druge tačke, te istakao kako je potrebno u program rada Parlamenta uvrstiti postprijemne obaveze, jer Parlament snosi dio odgovornosti, s obzirom da ratificira sporazume i nadzire

sprovođenje vanjske politike. Naravno, i Ministar snosi dio odgovornosti, i predložio je da se šalju izvješća meritornim institucijama kako bi se postigla veća efikasnost.

G. Izet Hadžić sugerirao je da nam Ministarstva dostavljaju izvješća o postprijemnim obavezama, kao i svoje programe rada, kako bi bili sigurni da su ta Ministarstva ažurirala svoje obaveze spram toga.

G-đa. Lidija Topić se zahvalila skupu, te potvrdila da je BiH propustili prvi i drugi rok i da do danas nije predočila izvješće niti po jednoj Konvenciji, osim finaliziranog izvješća po Konvenciji o pravima djeteta UN-a. Priprema se izvješće po Konvenciji o pravima žena u Ministarstvu za ljudska prava.

Ad.3. G. Raguž je otvorio raspravu o aktualnim političkim dešavanjima u svijetu, a u svijetlu krizne situacije u Iraku, te dao riječ ministru Ivaniću.

G. Ivanić je naglasio da je o ovome na traženje Komisije za vanjske poslove Zastupničkog doma dostavljen materijal, te je nagovijestio nekoliko ključnih stvari u vezi sa iračkom krizom. Stav Predsjedništva BiH eksplicitan je i navodi da Irak mora hitno i bezuslovno udovoljiti zahtjevima međunarodnih inspektora i svim obavezama koje proizilaze iz rezolucija Vijeća sigurnosti. Rečeno je da ne postoji razlika između stava Predsjedništva i Ministarstva spoljnih poslova BiH. MIP BiH insistira da Vijeće sigurnosti UN-a nađe odgovor na iračku krizu da bi se očuvali osnovni principi međunarodnog poretka. Ministar je rekao da Irak nije priznao BiH, niti imamo diplomatske odnose s tom zemljom. Također su navedena potraživanja BiH od Iraka, u iznosu od 920 miliona dolara. Ministarstvo vanjskih poslova je uputilo instrukciju DKP-ovima u zemljama Golfa da Ministarstvo kontinuirano informiraju o razvoju situacije u regionu.

G-đa. Hadžiahmetović je naglasila da BiH nema političku, ekonomsku niti vojnu moć na nivou jakih evropskih i svjetskih zemalja, te da naši stavovi ne utiču bitno na odluke vezane za Irak. Ono o čemu posebno treba voditi računa su implikacije globalne sigurnosne situacije vezane za Irak na Bosnu i Hercegovinu, a posebno u domenu ekonomskih odnosa, jer međunarodne finansijske institucije radikalno smanjuju kapital i dotok sredstava u BiH, što je implikacija globalne ekonomke krize.

G. Milorad Živković je istupio sa preciznim pitanjem da se Ministarstvo vanjskih poslova odredi koju 'stranu' eksplicitno zastupa? Da li stav SAD, koje su donijele mir na ovim prostorima, da li stav Francuske i Njemačke, ili nastavlja politiku nesvrstanih?

G. Ivanić je naglasio da BiH prima značajnu pomoć od Francuske i Njemačke i djela EU koje se protive napadu na Irak, s druge strane SAD su naravno u BiH prisutne finansijski, prema tome naglasio je da je BiH praktično između dvije opcije 'A' i 'B'. Istakao je da ovo nije vrijeme da se BiH izričito stavlja na stranu 'A' ili 'B', te da je stav Predsjedništva i MIP-a BiH sasvim dovoljan kao prvi nivo u izražavanju stava prema Iraku.

G. Muratović je rekao da je Parlamentarna skupština VE na zadnjem zasjedanju usvojila rezoluciju o Iraku koja je vrlo izbalansirana. Dakle Parlamentarna skupština Vijeća Evrope ima konsenzus oko Iraka, jedino nemaju predsjednici i premijeri država u EU. Na sljedećem zasjedanju koje počinje 31. marta prva tačka Dnevnog reda je hitno razmatranje situacije u Iraku, te bi rezolucije trebale biti osnov na koji ćemo se pozivati.

G. Raguž je predložio zaključak treće tačke Dnevnog reda, i okarakterizirao prethodnu diskusiju kao veoma pozitivnu, te naglasio kako je Parlamentu potrebno dostaviti detaljan izvještaj od strane MIP-a glede raspleta situacije o Iraku, a što se tiče naše zemlje.

G. Ivanić je obavijestio skup da je u trenutcima održavanja sjednice izvršen atentat na premijera Srbije i Crne Gore g. Zorana Đinđića.

G. Hadžić je kazao da Komisija za vanjske poslove Zastupničkog doma Parlamentarne skupštine BiH i Komisija za spoljnu i trgovinsku politiku Doma naroda Parlamentarne

skupštine BiH podržava stav Predsjedništva BiH i Ministarstva vanjskih poslova po pitanju iračke krize.

G. Ivanić je rekao da je Ministarstvo pripremio i dio potpisanih ugovora u postupku usaglašavanja između BiH i Republike Hrvatske i između BiH i Srbije i Crne Gore, a pripremljen je i dio dokumenata za posjetu Komisije za vanjske poslove Parlamentarne skupštine BiH Saboru R Hrvatske, njihovom vanjsko-političkom odboru, i posjetu Komisije za vanjske poslove Parlamentarne skupštine BiH Odboru za vanjsku politiku Državnog zbora R Slovenije.

Ovo je potvrdio i predsjedavajući g. Martin Raguž, te predložio da se ova tačka zaključi na sljedeći način:

- Prihvaćeno je izvješće koje je dostavljeno od strane Ministarstva vanjskih poslova BiH;

- Podržavaju se zaključci koje su u tom smislu zauzeli i Predsjedništvo BiH i Ministarstvo vanjskih poslova BiH i

- Zahtijeva se da se u pripremi rasprave na Parlamentu oba doma osim ovih zaključaka dostavi jedna ažurirana informacija o stanju krize vezano za Irak i ponudi analitička procjena o mogućim implikacijama u političkom, sigurnosnom i drugim bitnim segmentima za Bosnu i Hercegovinu.

Navedeni zaključak je usvojen.

Ad.4. Izvješće o akutnom stanju mreže diplomatsko konzularnih predstavništava Bosne i Hercegovine u Svijetu prvi je komentirao g. Ivanić koji je naglasio da je obaveza Ministarstva sistematizacija radnih mjesta koja mora biti usvojena u roku od 45 dana od dana stupanja na snagu tog zakona. Ova sistematizacija potrebna je radi financijske uštede, efikasnije organizacije te proširenja naše mreže DKP-a u one dijelove svijeta gdje naša zemlja nije zastupljena. Ministar je naglasio da g. Fuad Šabeta može ponuditi više informacija o ovoj temi, s obzirom na funkciju koju obnaša.

G. Šabeta je istakao da u svijetu Bosna i Hercegovina ima ukupno 51 diplomatsko-konzularno predstavništvo. Od toga je 39 ambasada, a 1 diplomatsko-konzularno predstavništvo je ujedno ambasada i misija (Brisel), te posjedujemo još 4 misije i 7 generalnih konzulata.

U mreži je ukupno 327 radnih mjesta, a u sjedištu ukupno ima 218 radnih mjesta. Upravo ova disproporcija u brojevima je jedan od glavnih zadataka za Ministarstvo u narednom periodu. Prethodni saziv Ministarstva je na tom planu uradio određeni pomak, ali broj uposlenih u Ministarstvu mora biti u najmanju ruku ravan, radi matematike, onom broju koji je uposlen u DKP mreži. U suprotnom se svake 3 ili 4 godine, ovisno kada ih se povlači, mora tražiti neke potpuno nove ljude za obavljanje tog posla. To je jedan od zadataka. Ono što je također vrlo bitno je kadrovska popunjenost u Ministarstvu (pri tome se misli i na DKP mrežu). Također je istaknuto da će se kroz zakon o državnim službenicima i uz pomoć Agencije dobiti Ministarstvo vanjskih poslova koje je kvalificirano da radi ovaj posao te da će imati službenike koji će aktivno govoriti bar jedan svjetski jezik.

G. Raguž je otvorio raspravu o ovoj tački Dnevnog reda.

G. Živković je zahtijevao da Komisija dobije izvještaj o najurgentnijim stvarima koje je potrebno sprovesti, jer Parlament također mora dati svoj udio u tome.

G. Avdić također je podržavajući g. Živkovića, tražio da se dostavi informacija u narednih mjesec dana od strane Ministarstva na osnovu koje Parlament može voditi raspravu, te da se zbog hitnosti ne treba čekati na kompletnu analizu Ministarstva.

G. Raguž je u zaključku ove tačke naglasio da se očekuje izvješće u narednih mjesec dana, te istakao da Ministarstvo treba pristupiti studioznoj analizi svake pozicije u DKP

mreži, bilo da se radi o destinaciji ili broju ljudi. Naravno, s ovim u vezi potrebna je dostupnost ovih informacija bh. javnosti.

Ad.5. U planu posjeta na nivou Parlamentarne skupštine Bosne i Hercegovine za ovu godinu g. Raguž je obavijestio prisutne i goste da krajem mjeseca Predsjednik njemačkog Bundestaga dolazi u zvaničnu posjetu našoj zemlji, te da se u to vrijeme, ukoliko bude moguće, organizira zasjedanje Parlamenta i tom prigodom upriličiti obraćanje Predsjednika Bundestaga našem Parlamentu. Također je rekao da su članovi Komisije za vanjske poslove razmatrajući ovaj plan dali sugestije da treba intenzivirati suradnju sa susjednim zemljama, kao i zemljama u regionu.

G. Ana Trišić-Babić je istakla da je ovo prvi put da je Ministarstvo vanjskih poslova napravilo prijedlog posjeta Parlamentu, te da je ovaj program napravljen na osnovu raspoloživih informacija koje Ministarstvo posjeduje.

G. Raguž je pozdravio ovaj korak Ministarstva, te naglasio da je osim posjete Predsjednika njemačkog Bundestaga u planu i posjeta delegacije BiH Republici Iran. Rekao je da je to novost, te da se treba uvrstiti u kalendar za ovu godinu.

G. Živković je zahtijevao da se ubuduće navode razlozi posjeta (suradnje), te je rekao da posjeta delegacije BiH Republici Albaniji nije obrazložena; slično je i sa posjetama Australiji, Novom Zelandu, Japanu. Također je istakao da bi bilo korisno navesti zemlje sa kojima nismo ostvarili kontakt i tom je prigodom pomenuo afričke zemlje. Precizirao je da se BiH posebno treba fokusirati na suradnju za zemljama članicama Vijeća sigurnosti UN.

G-đa. Hadžiahmetović je dodala da u te posjete treba biti uključena naša DKP mreža, što je dodatak našoj bilateralnoj komunikaciji sa dotičnom zemljom.

G-đa. Seada Palavrić je zatražila priručnik o protokolima prilikom diplomatskih posjeta.

G. Šabeta je rekao da standardni protokol ne postoji, ali da Ministarstvo priprema za svaku zemlju protokol kada se ukaže potreba.

G-đa. Trišić-Babić je obećala da će Ministarstvo dostaviti g-đi. Palavrić knjigu diplomatskog protokola.

G-đa. Palavrić je također podsjetila skup da 15.04. tekuće godine šest članova delegacije leti u Berlin na sastanak sa članovima njemačkog Bundestaga, a nakon toga zakazana je posjeta Briselu i to sastanak sa Evropskim parlamentom.

G. Šabeta je s tim u vezi rekao da je neophodno obavijestiti Ministarstvo vanjskih poslova kako bi se obavijestilo diplomatsko-konzularno predstavništvo, jer je i to dio protokola.

G. Raguž je zaključio ovu raspravu te rekao da su dobivene kvalitetne sugestije iz Ministarstva vanjskih poslova BiH.

Ad.6. Vezano za informaciju o 4. Parlamentarnoj konferenciji Pakta stabilnosti za Jugoistočnu Evropu koja će se održati od 21.-22.05.2003. godine u Briselu, g. Sabrija Šerifović, doskorašnji pomoćnik ministra u Ministarstvu za evropske integracije i rukovodilac sektora za koordinaciju sa Paktom stabilnosti, naglasio je da je prisutnima na sjednici podijeljen izvještaj sa sastanka Regionalnog stola Pakta stabilnosti održanog 16. decembra 2002.godine u Solunu. Naravno, istakao je da BiH u aprilu mjesecu 2003.godine preuzima predsjedavanje tom inicijativom.

G. Raguž je napomenuo da javno saslušanje u organizaciji Komisije Evropskog parlamenta za vanjske poslove, ljudska prava, zajedničku sigurnost i odbranu i Delegacije za odnose sa zemljama jugoistočne Evrope na temu 'Nova strategija Evropske Unije prema jugoistočnoj Evropi' treba osnažiti proces stabilizacije i pridruživanja, te da to predstavlja jedno od najznačajnijih vanjskopolitičkih pitanja. Naravno sve korake vezane

za Pakt stabilnosti treba raditi u suradnji sa Ministarstvom vanjskih poslova BiH i Direkcijom za evropske integracije.

G. Šerifović je naglasio da ova Konferencija predstavlja pripremu za sastanak u Solunu 21.06.2003. godine, gdje će biti predstavnici EU i zemalja regiona. Također je navedeno da se detaljne informacija za pripreme ovog sastanka trebaju tražiti od Ministarstva vanjskih poslova BiH.

Ad.7. Predsjedavajući Komisije, g. Raguž je predložio da se sjednica zaključi i da članovi Komisije verificiraju zapisnik sa šeste sjednice, što su oni jednoglasno i učinili.

Sjednica je završena u 15:30 sati.

Zapisnik sačinile na osnovu neautoriziranog transkripta :

Merdžana Iglica, sekretar Komisije

Amra Alispahić, student stažista